


Komîteya PDKî li Utrîşê di daxuyaniyekê de ragihand ku monomênta bîranîna şehîdên Vîyenê ku li cihê terorkirina şehîd Dr. Qasimlo de perde li ser hatibû hildan, ji aliyê kesên nenas ve bi rengê Sipî hatiye têkdan. Herçend vekolînên derheq vê kiriyarê nemirovane ji aliyê dezgehên peywendîdar ên Otrîşê ve berdeyam in, lê guman di vê yekê de nîne ku ev rîftara neşarîstanî, karê taqimên ser bi Komara terorîstperwer a Îslamî a Îranê ye.

## Gotûbêj li pêxema aştiyê, Roja Quds jî li pêxema şer û xwînrejiyê



Çendîn girûpên Felestînî ku mezitirîne wan Hamas e, ragigandin ku hewlên xwe dê li dijî pêvajoya aştiya Îsrail û Felestînê berfireh bikin. Eve di halekê de ye ku gotûbêjên aştiya di navbera Natanyaho, Serokwezîrê Îsrailê û Mehmûd Ebas, Serokê Teşkilata xwebirêveber a Felestînê, ji roja Pêncşemî, 11'ê Xeramananê li Waşingtonê bi fermî destpê kiriye.

Roja Çarşemî, 10'ê Xeramananê, Barak Obama di konferansek nûçegihanî de di Koşka Sipî de ku bi beşdariya Natanyaho, Mehmûd Ebas, Serokkomarê Misrê û Şahê Urdunê birêve çû, hêvî xwast ku gotûbêjên aştiyane di heyamê salekê de bikare bigîje vajoya rêketinnameyekê.

**Dom R: 7**

**Birêz Mistefa Hicrî, Sekerterê Giştî yê PDK Îranê:**  
“Rejîma Îranê çalakên sivîl û siyasî bi tometa qaçaxkirina madeyên sirker îdam dike”  
R: 2



**Birêz Dr. Salih Mela Umer:**  
“Vekişîna hêzên Amerîka ji Îraqê rewşê aloztir û dê pirsgerêkan ji bo hikûmeta Herêma Kurdistanê pêk bîne”  
R: 3



### Rûpel 2



**Eyad Ellawî:**

Îran rola nerênî li îraqê de dilîze

### Rûpel 5



**Derxistina mamostayên zankoyê pîlanek...**

### Dara Natîq

### Rûpel 8



**Girtîgeh yan kuştargeh?**

**Ceifer Mubersîrniya**

### Rûpel 9



**Madeyên Sirker! Belayek Bo xelkê, neimetek...**

**Leyla Seadetî**

## Mistefa Hicrî:

## “Rejîma Îranê çalakên sivîl û siyasî bi tometa qaçaxkirina madeyên sirker îdam dike”

**R**êzdar mistefa hicrî sekreterê Giştî yê PDKÎ ku roja 31.08.2010'an di bernameya beşa Farsî a “Tish Tv”

a bi navê “Rozenê” de mêvan bû, nêrîn û boçûnên xwe derheq mijarên siyasî ên rojevê eşkere kir. Di destpêka hevpeyvinê de û di bersiva pirsyarekê de derheq armanca sereke a Komara Îslamî a Îranê ji xurtkirina pêvajoya serkut û tepeserkirina netewên Îranê de got: Bingeha vê siyasê vedigere bo vê ku niha di navxweyî welatê Îranê de û di wan herêmên ku netewên cur bi cur ên Îranê têde akincî ne, hejmara çalakên siyasî ku hewilê didin bona bidestxistina mafên siyasî ên xelkê xwe, pîrr zêde bûne. Hişyariya netewî di herêmên han de berfirehtir bûye û yek ji sedemên zêdebûna astê hişyariya siyasî, zulm û zordariya Komara Îslamî ye. Zêdebûna astê daxwazên netewan pêwendiyek rasterast heye digel tepeserkirina netewên Îranê û îdamkirina çalakên siyasî ên deverên han li jêr navê qaçaxçiyên madeyên sirker, girêdayîbûn bi aliyên biyanî û herwiha tawanbarkirina wan bi encamdana kiryarên cînayetkarane û nebaş. Lewra rêjîm bi hêcetên han xelkê azadîxwaz tepeser dîke.

Mistefa Hicrî herwiha di doma axivtina xwe de îşare bi nameya yek ji fermanderên besicên Azerbaycana Rojhelat bo nûneratiya navenda rêberî bo karûbarên navnetewî a vê hêzê kir ku têde bas ji terheja rejîmê bona rêxistna hinek kesan di welatê Azerbaycan û Nexcevanê de hatiye kirin bi armanca bêhurmetîkirin bi pêxemberê Îslamê û Îmamên Şîe di belavok û rojnameyên vê herêmê de di bin navê neteweperestiya Turk. Di vê nameyê de bas ji vê yekê hatiye kirin ku “hewilê bidin bi her awayekê be ewlehiya canî û maliya sîxoran di vê gelaleyê de biparêzin.

Hicrî di pêwendî tevî bêdengiya medyayên zal bi ser pêvajoya tepeserkirinan di herêmên Îranê ên ku netewên weke Kurd, Turk, Belûç, Erebi û... têde akincî ne kir û got: Ez gellek zîndanîyên siyasî di Kurdistanê de nas dikim ku cezayê zîdana dirêjheyam bi ser wan de hatiye sepandin. wan gellek salên dûr û dirêj di girtigehan de derbaz kirine û heta hinek ji wan mafê vê yekê jî bi wan

nehatiye dan ku di zîndanên Kurdistanê de heyamê zîdana xwe biqedînin daku aliyê kêm malbatên wan bikarin seredana wan bikin û hewcehiyên rojane ên jiyana wan dabîn bikin. Rejîm girtiyên han bo navend û deverên dîrdest ên Îranê vediguhêze. Lewra malbatên girtiyên siyasî ku piraniya wan ji çîna destkurt û hejar a civakê ne, seba destkurtiyê nikarin zûzû seredana ewladên xwe bikin û navê wan kesane di tu cihekê de nediyar e.



Di wan rojane de di medyayên hizbî û saziyên siyasî ên Kurdî de bas ji zîndanîyê siyasî ê Kurd bi navê “Rehîme Reş” tê kirin ku hûn bi tu awayekê dengdana vê nûçeyê di medyayên navnetewî û navxweyî ên Îranê de nabînin. Ez xatircem im ku di gellek deverên din ên Îranê de ku netewên cur bi cur têde akincî ne, zîndanîyên han ên siyasî pîrr zêde ne û vê dawiyê hinek nûçe di zîndan Meşhedê de derketine ku bas ji vê yekê dikin ku di 2-3 mehên borî de sedan girtî bi tawana qaçaxkirina madeyên sirker hatine dardarkirin. Tawanek ku dûr e ji rastiyê.

Îdiaya parvekirina Îranê yan şerê dinavbera netewên vî welatî de, yek ji deîyên dijberên fedralîzmê di Îranê de ye Mistefa Hicrî di vê pêwendiyê de dibêje: Gotina vê qisê ku fedralîzm û otonomî dibe sebebê parvekirina Îranê, dirûşmek e ku ji aliyê rejîma Îranê ve tê dan û berê jî ji aliyê rejîma Paşyê ve dihat gotin. Yê ku di vê pêwendiyê de piropagendê dikin, xincî dezgehên fermî ên rejîma Komara Îslamî a Îranê, dibine du deste. Hinek ji wan girêdayî ne bi Komara Îslamî a Îranê û diyar e ku rejîma Komara Îslamî dema xwazyarê pêkanîna her rewşek siyasî be, ji zîmanê çalakek yan kesayetiyeke asayî belav dîke. Beşek din jî, ji wan kesan pêk tên ku xwediyê zaniyariyên zêde di vê derbarê de nînin. Em dibînin ku li derveyî welatê Îranê de gellek welatên din ên firenetew hene ku di wan welatan de û di çarçoveya sistemek federal û otonom de bihevve dijîn û xwediyê mafên xwe ne û tu pirsgirikek jî ji wan re pêk nehatiye. Her di Îranê de me bi xwe ezmûna du hukûmetên otonom ên

Azerbaycan û Komara Demokrat a Kurdistanê hebûye. Lewra em dikarin bibêjin ku fedralîzm ne tenê nabe sedema pêkhatina nakokiyên, belkî hevgerîna jî di nava netewan de pê tîne. Çimku ger netewên Îranê xwediyê mafên xwe bin û bikarin herêmên xwe bi xwe birêve bibin û ferq û cudahî nemîne, ew dê çima daxwaza cudabûnê bikin?!

Di pêwendî digel dirûşma hilweşandina rejîma Komara Îslamî û ew boçûnên ku dibêjin cîbicîkirina dirûşmek han hewcehî bi bikaranîna tundûtûjiyê heye û encama wê dibe sebebê pêkhatina dîktatoriye, sekreterê Giştî yê Partiya Demokrat got: Bi raya min eva ne gotinek rast e, çimku hukûmetên wisan hene ku bê bikaranîna tundûtûjiyê desthilat girtine destê xwe û di encam de bûne dîktator. Yanî ev pîvana giştî ne rast e û berevajiya vê hizrê jî hebûye. Her di vê niv sedsala borî de hinek welat hebûne ku di encama çalakiyên sivîl û dûr ji tundûtûjiyê hatine hioşîn û li cihê wan de hinek hukûmetên demokrat û hinek caran jî dîktator gihştine desthilatê. Bo mînak Yekîtiya Soviyeta berê ku yek ji wan welatên herî bihêz ên cîhanê bû ku bê tundûtûji hilweşa û encama hilweşana wê jî pêkhatina hukûmetên herêmî bi destê netewên wî welatî bû. Di nava wan hukûmetan de hinek ji wan bi şewazên demokrat tîr birêvebirin û hinek jî nedemokrat in. Lewra derkirina hukma giştî derheq ewê ku encama bikaranîna tundûtûji û şoreşkirinê, dîktatorî ye ne rast e û berevajiya wê jî dîsa ne rast e. Lewra baskirina tiştên han di berjewendiya parastina rejîma Îranê de ye.

## Eyad Ellawî, Îran Bi Rollîstin Di Rewşa Siyasî A Îraqê De Tawanbar kir

Eyad Ellawî, carek din jî êrîş kire ser Komara Îslamî û bi wê yekê tometbar kir ku dixwaze Îraq bike welatek ku li dewsa wê de bimeşe.

Navhatî bi rojnameya “Elreî” a Kuwêti re ragihand: Welatê Îranê di nav Îraqê de aliyekê bi dijî aliyekî din han dide û dixwaze Îraqê bike welateke bindestê xwe û rola xwe di wî welatî de pêtir bike.

Ellawî, seba wan hewlên Îranê hişyarî da aliyên siyasî ên Îraqê û got: Îran dixwaze di pêxema berjewendiya xwe de şerê tayîfî di Îraqê de xurt bike.



Dr. Salih Mela Umer:

## “Vekişîna hêzên Amerîka ji Îraqê rewşê aloztir û dê pirsgrêkan ji bo Hikûmeta Herêma Kurdistanê pêk bîne”

### Hevpeyvîn: Selîm Zencîrî

**P**êknehatina hikûmeta nû ya Îraqê, vekîşîna hêzên şerker yên Amerîkayê,

desttêwerdana dewletên cîran li kar û barên Îraqê û bandora wan li ser pêgeha kurd li vî welatî de, ji mijarên sereke yên hevpeyvîna me bi Dr. Salih Umer, mamostayê zanîngeha Selaheddîn in ku em bala we xwendevanên hêja jêre radikişînin.

Li ser pêknehatina hikûmeta nû ya Îraqê piştî borîna 6 mehan bi ser hîlbijartinên Parlemanî yên vî welatî de û ew sedem û fakterên ku li vî derheqê de bibandor in, dr. Salih Umer wiha bersiv da.

Him sedemên derekî û him jî sedemên navxweyî hene. Li asta navxweyî de, sedem ev e ku li nav civaka Îraqê de kultora hevdu qebûlîkirin, bawera siyasî li nav aliyên cûrbicûr, civaka sîvîl û nasnameya netewî ya Îraqîbûnê nine, eqliyetek ayînî û eşîretî li vî civakê de serdest e ku rêz ji yasa û destûrê nagre.

Sedemên dereke jî em dikarin parveyî du desteyan bikin:

1: Desttêwerdana welatên deverê weke Erebestan, Sûriye, Misir, Turkiye û Îran, ku her yek ji wan ji aliyekê ve berevaniyê ji şîe û suniyan û ji hêla din ve jî berjewendiyên xwe dîşopînin.

2: Guhertin li siyaseta Amerîka li Îraq û Rojhilata Navîn de. Dewleta Amerîka li destpêka hîloşandina rejîma Beis de bi hemû awayekê hewil da ku demokrasiyê li Îraqê de çîgîr bike. Lê li sala 2006'ê vir de dema ku Îraq tûşî kirîz û pirsgrêkan hat, Amerîkayê girûpek bi navê “Bîkir Hamilton” ji bo nixandî û analîza rewşê şande Îraqê. Wê girûpek jî hin pêşniyaz pêşkêşî dewleta wê demê ya Amerîkayê kirin ku hewce ye Amerîka tenahî û seqamgiriyekê li nav Îraqê de pêk bîne, lewma hewce dike ku danûstandin û guftigoyê li gel Îran, Sûriye û welatên Erebi de bike. Bona wê ku berjewendiya hemû dewletan li Îraqê de misoger û bihê parastin. Lewma me dît ku bi awayekî piraktîkî li gel dewleta Îranê rûniştin. Nansî Pîloşî jî bi xwe serdana Sûriyayê kir û bi Beşar Esed re rûnişt û basa piroseyî navxweyî a Îraqê kir.

Lê pirsîyarek vir de tê pêsî gelo demokrasiyek ku Amerîkayê ji riya guftigo û diyaloga bi Îran û Sûriyayê re bawerî pê hebe, dibe çî cure demokrasiyek be!? Ew ne demokrasi ye, belkî çîgîrkirina ewlehiyê ye. Niha jî bi vekîşandina hêzên xwe dixwaze desttêwerdanê li kar û barên hundirîn yê Îraqê de neke bona wê ku civaka Îraqê bi xwe çarenivîsa xwe diyarî bikin.

Kîjan ji wan welatên ku we navê wan bir, kariye herî zêde hevkeşeyên siyasî yên Îraqê bi qazanca xwe biguherîne û zêdetirîn nîfûz û karigerî li wî welatî de hebe?

Berê Îraq xwedî dewletek bihêz li deverê de bû û li hember Îranê de rawestiyabû, bi vî çendê jî balansa desthilatê li Rojhilata Navîn de hatibû parastin. Ev yeke jî li berjewendiya Amerîka û Îsrailê de bû. Ji hêla din ve jî stratejiya Amerîkayê ew bû ku lawazbûna her yek ji wan, tê wateya lawazî û bêhêz bûna dujminên Îsrailê. Şerê 8 salî jî minaka vî lawazbûnê û li berjewendiya wan de bû. Lê piştî hîloşîna rejîma Beis, Îraqê nekarî li hember berjewendiyên Îranê de bisekine yan balans û terazûya hêzê biparêze. Lewma ger zorahiya şîeyan li Îraqê de desthilatê bidest bigrin, egera wê heye ku li gel Îranê de lihev bînin û wê demê jî metirsiyê bo ser berjewendiyên Amerîka û Îsrailê biafirînin. Lê dewleta Amerîka pir huşyarane û zîrekane tevgeriya û li listika siyasî a xwe de girîngî bi welatên erebî weke Misir, Erebestan, Urdon û heta Turkiye jî da û bi awayekê ew rakêşî qada siyasî ya Îraqê ji bo berevanî kirin ji erebên sunnî yên Îraqê kir û karî wan bihevre mijûl bike û balansa desthilatê li Rojhilata Navîn de pêk bîne ku berjewendiyên xwe û Îsrailê pê biparêze. Lê bi qenaeta min Amerîka vî iznê nade ku tu dewletek li deverê de xwe bi ser dewletek din de serdest bike û dê bixwe take desthilata bîrikeber li deverê de bimîne.

**Çarenivîsa hikûmeta Îraqê dê bigihîje kur? Gelo dê bibe hikûmetek ku pênasê û teibirî ji hemû Îraqiyan bi pêkhatiyên netewî û ayînî yên cuda bike?**

Eva pîr zehmet e. Çunku em bas ji vî hindê dikin ku me dewletek demokratîk hebe ku hemû aliyek li ser de lihevhatibin û berjewendiya tev aliyekê têde bihê parastin. Mînaka Lubnanê dikare ji bo Îraqê guncaw be. Lê hinekê zehmet e, çunku eqliyeta erebên sunnî li Îraqê û deverê de li dû bakgirawendek 80 salî a dîktatorî û desthilatdariya xwe de digere û dixwazin vî desthilatê li destê xwe de biparêzin, lewma dewletên îro yên erebî vî siyasê qebûlî nakin ku desthilata yekem li destê şîiyan de û desthilata duyem jî li dest kurdan de be. Lewma him modela Lubnan û him jî modelek demokratîk weke dewletên rojava pîr zehmet e çîgîr bibe. Bi raya min kêşe û kirîz carê dê berdeyam bin û heta eger hikûmet jî pêk were, gelek bihêz nabe û biryarên hikûmetê li her cihê birêve naçin. Bo mînak li Parêzgeha Mûsilê ku wan zorahiya dangan bidest xistin û kurd beşdarî piroseyî siyasî li wir nekirin, biryarên wan jî li deverên kurd akincî de birêve naçin û guh jêre nahê dayîn, lewma



**“Ger kurd dixwaze deverên veqetiyayî veqerîne, hewce ye gelek bihêz be. Çunku li cihêkê ku kar bi yasa û destûrê nehê kirin, divêt bi hêz bihêkirin”**

ger mêzeyî waqî'a siyasî a Îraqê bikin, baştîre ku Îraq dabeşî sê deverên federal bihê kirin ku her yek li cihê xwe de hukim bikin.

**Li wiha rewşekê de gelo her yek ji sunî û şîeyên Îraqê gihîştine vî bawerê ku wan jî herêmek federal hebin bona wê ku çî din li bindestiya hev de nebin? Li rewşek wiha de destkefta kurdan çî dibe?**

Piraniya sunniyan li dîtingeha parvebûna Îraqê mêzeyî federalîzmê dikin. Çunku dema temaşayî cuxrafîyaya xwe dikin ku 3-4 Parêzgehên bêdahat û bê neft hene û li hember de jî Herêma Federal a Kurdistanê û deverên Şîi çavkaniyên binerd û cihên geşt û guzar û turîstî yên pîr dahat û dewlemend hene, hest bi metirsiyê dikin û bi hemû awayekê dijberiya sîstema federalîzmê dikin.

Lê ger em bi awayek rast û realîtane mêzeyî federalîzmê bikin, bi tu awayekê wateya parvebûnê nade û gelek jî welat jî bi vî sîstemê birêve diçin. Nemaze Îmaretên Yekgirtî yên Erebi jî ku sîstemek federalîstî ninin, lê dabeşkirina desthilatê hene ku gelek jî vî sîstemê nizîk e. Lewma ger ev sîstema ser bigre û her yek ji kurd, sunnî û şîi îdare û birêveberiya xwe bikin, dê hewil bidin ku xwe vegeşînin, li egera pêşketin û vejîna her yek ji wan jî Îraqê geşe dike û bihêz dibe, wê demê jî berjewendiya hemû takên Îraqê parastî dimîne. Lewma li gor nixandina eqliyeta wan zehmet e ev sîstema ser bigre. Lê li rastî de metirsiya mezî û sereke, eqliyeta wan e ku Îraqê ber bi parvebûne dibe nek sîstema federalî.

Lewma eve siyaset û hêviya me ye ku erebên sunnî û şîî jî vê rastiye qebûl bikin û bêşik cihgîrbûna vê sisteme karigerî û bandor li ser berjewendiyên kurd li hemû warekê de dike û metirsiya bihêzbûna desthilata navendî li ser namîne ku carek din kurdan tepeser bike, lê niha kurd metirsi li ser heye ku cîneyetên berê bi awayek din li ser de bihên dubare kirin.

**Li halekê de ku hêj rewşa ewlehî û tenahiya Îraqê aloz e, me dît ku hêzên şerker yê Amerîkayê piştî 7 sal mana xwe, Îraq bi cî hiştin. Ev vekîşina hêzan çi tesîr û karigeriyek li ser rewşa Îraqê bi giştî heye?**

Eva ku em dibînin piştî 6 mehan carê hikûmeta nû pêk nehatiye, ewlehî û aramî cihgîr nebûye, kiryarên terorîstî zêde bûne, li biyava abûrî ve dewletek nine ku pirgramên abûrî dabirêje, xizmetguzariyê pêşkêşî hevvelatîyên xwe bike û stratejiya nehîştin û kêmkirina radeya békariyê li pêş xwe bigre û gelek pirojeyên din..., eve bandorek pir xerab û nerênî li ser civaka Îraqê li warên siyasî, aborî, ewlehî û civakî de kiriye. Lê hewce ye em waqî'binanetir bifikirin ku niha Amerîka siyaseta xwe guhertiye û ev siyaseta girtiye pêşberî xwe, lewre divêt civak û her yek jî takên Îraqê hest bi berpirsatiya zêdetir bikin û vê valahiye teji bikin, berevajî wê, desttêwerdana welatên cîran çi weke topbarankirina sînoran, çi weke têkdana ewlehiya wî welatî dê zêdetir be. Bi taybet Îran û Sûriya zêdetir li pey berjewendiyên xwe li Îraqê de digerrin û pirsên Îraqê aloztir û ewlehiya wê jî lawaztir dikin û nemaze warê derûnî û psikolojiya Îraqiyan jî dihiloşînin.

**Gelo ev vekîşandina hêzan li cihê xwe de bû? Yan çi sedem û faktorek din li vê vekîşandinê de kariger û bitesîr bûn?**

Eva rastiyeke ku Amerîka superhêzek cîhanî ye û tenê bîr ji berjewendiyên xwe dike. Dewleta Amerîka li serdemê şerê sar de pêtirî 40-50 salan rikeberiya Yekêtiya Soviyetê kir daku pêşiya îdeolojiya kumonîstî bigre. Amerîkayê bi xurtkirina îdeolojiya lîberal demokrasîyê karî li Ewropaya Rojhilat de serketinê bidest bixe û piraniya wan welatan bûn bi dost û hevalbendê Amerîkayê û nemaze bûn bi endamê "Nato"-yê. Lewre Amerîka xwast vê siyasetê li Rojhilata Navîn de jî bimesîne, lê dema ku hate nav waqî'a Rojhilata Navîn, zêdeyî 500 Bîlyon dolar mezaxt, (serf kir) 4-5 hezar leşkirên wan hatin kuştin û piştî 7 salan hêj nekariye Îraqê ewle û demokratîk bike, vêca çi bigihîje bi wê ku xwe bi welatek din re mijûl bike û bixwaze demokrasîyê li wan welatan de cihgîr bike. Tu bêjî têçûya wan çiqas be bo Amerîkayê!?

Ji hêla din ve jî em dibînin ku Çîn û welatên Ewropayî bilez geşe dikin, û Amerîka jî nikare her xwe mijûlê şer bike û eva jêre dibe bi pirsgirêk û li warê aborî de



**“Jiber ku lîstika siyasî li navbera Îran û Amerîkayê de bi metoda serketina aliyekê ye, li rewşek wiha de her du alî hewil didin ku bi ser aliyê beramber de biserbikevin”**

dê tûşî şikestê bibe û dê superhêziya xwe jî dest bide, lewma ye biryarê dide ku hêzên xwe vekîşîne û balansa hêzê li Rojhilata Navîn de bi ragirtina welatên şîî û sunî li hemberî hev de biparêze û xwe bi tenê erkê îdare kirina kirzan bigre stû yê xwe, ne eva ku xwe bibe beşek ji kêşê, şer bike û pare xerc bike. Lewma ger vê hezîneyê bo her yek jî welatên dîktatorî yê deverê berçav bigrin, divêt Amerîka çiqas din bac bide bo cihgîr kirina demokrasîyê? Li rastî de ev vekîşandina hêzan manaya bicih gihandin û encamdana serûber ya erkên xwe li Îraqê de nine.

**Gelek ji karnasên siyasî li ser vê baweriyê ne ku ev vekîşandina hêzan pêwendî bi meimûriyetek din ya Amerîkayê ve heye ku ew jî êrişê ser Îranê ye. Hûn vê yekê çawan analiz dikin?**

Nêrîna han ji rastî û waqî'a vekîşandina hêzên Amerîka ve dûr e. Çunku li gor pirojeya "Bîkir Hamilton" hewce ye rol û desttêwerdana Amerîka kêmrir û rola NY û welatên cîran jî zêdetir be. Lewma jî çendînan caran li gel Îranê diyalog kirin! û ger felsefeya vekîşandina hêzan, şer li dijî Îranê baya, guftigo li gel Îraqê bo cihgîr kirina ewlehiyê li Îraqê de nedikirin. Lê berevajî, mesele gelek jî vê girîngtir e û Amerîka dikare bi vekîşandinê baştir îdareya kirzên cîhanî bike ku pirograma etomî ya Îranê jî yek ji wan e. Îdareya Pakistanê bi heman şêwe ku welatek xwedî etom e û ger Taliban û islamiyên tundrew li wî welatî de desthilatê bidest bigrin, metirsiyek zaftir bo ser berjewendiyên Amerîka û Îranê pêk tê. Lewma dixwaze bi îdarekirina kirzan, pirsgirêkan ji riya dîplomasiyê û Wezareta Derve çareser bike. Bi taybet derheq Îranê doktorîni Obama bawerî bi pîrensîp, dîplomasiyê û hevkarîyên cîhanî hene heta êrişê leşkirî.

**Mebest ji hevkarîyên cîhanî?**  
Merem eve dike ku ku li egera êrişê leşkirî

de, hewce ye biryara Civata Ewlekar ya NY li ser be ku bi nixandina helwesta Çîn, Rûsiya û nemaze Firansayê û bi liberçavgirtina kirzên niha yê cîhanî, zehmet e biryarek wiha bê dayîn. Êrişê yekalî weke ya Îraqê jî zehmet e. Lê siyasetek din li hemberî Îranê de heye û dixwaze bi awayek din riftarê bike, dîplomasiyê bikar bîne, girîngiyê bide opozîsyona Îranî û guhertinê li hundirê Îranê de pêk bîne.

**Çend rojan berî niha Jeneral Odêrno û balyozê nû yê Amerîka li Îraqê li du ragihandinên cuda de rejîma Îranê bi berpirsiyarê kuştina yek ji çar a leşkirên Amerîka li Îraqê û herweha Komara Îslamî bi astenga ser riya demokrasîyê dan zanin. Gelo ew kar û kiryarên rejîma Îranê vedigere ser wê ku Îraqek demokratîk bi gef li ser xwe dizane yan şikestdana Amerîka?**

Balyozê nû yê Amerîkayê li Îraqê de pêwendiyek pir xurt bi sunniyan re heye û dixwaze bi awayekê sînorekê ji bo Îranê diyarî bîr û destê rejîmê li Îraqê de kurt bike. Lê eger dewleta Amerîka ew zaniyarî hebin, çima zêdetir guftigo nekiriye yan bi awayek piraktîkî li dijî Îranê neliviyaye?

Jiber ku lîstika siyasî li navbera Îran û Amerîkayê de bi metoda birina aliyekê ye, li rewşek wusa de jî her du alî hewil didin ku bi ser aliyê beramber de serbikevin. Bi taybet xwendin û analîza Îranê bi vî awayî bû ku ger dewleta Îranê bi hêsanî bikare demokrasîyê li Îraqê de cihgîr bike, (wekî wê ku li destpêkê de karî li Efxanistanê de bike) renga gava duyemîn lêdana Îranê be! Lê piştî borîna 7 salan nekariyê vê sisteme cihgîr bike û li warê siyasî û aborî de tûşî kêşeyan hat. Lewre eqliyetek serihilda ku çi din Amerîka hêza leşkirî bikar nehîne û li ser hêza dîplomasiyê bixebite, eva jî bi qazanca Îran bû. Bi giştî nabe em înkara nifûzê û bandora rejîma Îranê li ser civaka Îraqê û bi taybet şîeyan bikin. nemaze pêwendiya kurdan jî bi Îranê re

xirab nine û kunsolxane li her du bajarên Hewlêr û Solêmaniyê de heye, eva jî bûye sedem ku pêgeha Îranê li Îraqê de bihêztir û kêşeyan bo Amerîkayê biafirîne.

### Vekişîna hêzan çî karigerî li ser Herêma Kurdistan Federal heye?

Siyaseta Amerîka eve bû ku demokrasiyê cihgîr û paşan jî vekişandina hêzan bû, wê demê metirsiyek wiha li ser berjewendiyên kurdan nedibû, lê niha ku pîrsa madeya 140'ê û deverên veqetiyayî, pîrsa yasaya neft û gazê, pîrsa bûdceya pêşmerge, guhertinên destûrê û desttêwerdana welatên cîran û ..., tu yek li berjewendiyên kurdan de nine û tenê kurd e ku bê dost û alîgir e û kes nine ku berevaniyê jê bike. Bi taybet metirsiya topbarankirina sînorên Herêma Kurdistanê ji aliyê Îran û Turkiyayê ve her li cih de ye. Lewma ev hemû pîrs û aloziyane hevdem li gel vekişîna hêzên Amerîka rewsê aloztir û dê pîrsgirêkan ji bo hikûmeta Herêma Kurdistanê pêk bîne.

### Ku waye tîrsa êrişa leşkerî ya desthilata navendî ya Îraqê, dewleta Îran û Turkiyê bi eşkereyî gefê li kurdan bixwet?

Ger tîrsa êrişa leşkerî jî nebe, egera wê heye ew tiştên ku li destûrê de bidest xistine, kêmtir bihên kirin. Weke ew siyaseta ku li Mûsilê de li hember kurdan de tê peyrew kirin. Lê ew metirsiyane dê her berdewam bimînin.

### Çarenivîsa madeya 140'ê û deverên veqetiyayî dê bigîje kur?

Em dilxweş bûn bi çareseriyê aştîyane, demokratîk û destûrî ya madeya 140'ê, lê niha demokrasiyê û rêzgirtin ji destûrê girîngiya xwe ji dest dane, herweha lîstikên siyasî yê Erebistan, Misir, Turkiye û Îranê û desttêwerdanên wan pirose zehmettir kirine. Ger kurd dixwaze deverên veqetiyayî vegeirîne, hewce ye gelek bihêz be. Çunku li cihekê ku kar bi yasa û destûrê nehê kirin, divêt bi hêz bihêkirin ku eva jî

vedigere ser hêz û şiyana kurdan. Gelo ev hêze heye ku berbirûyê dewletên cîran û erebî bibe? Gelo şiyana berbirû bûn bi yekîtiya erebên sunne û şîî li ser doza Kerkûkê û deverên din de heye?

Li rewşek wiha de ku erebên sunnî û şîî û dewletên deverê li dijî te bixebitin, kar jî bi destûrê nehê kirin, Amerîka jî hevkarîya te neke û Îraqê bicih bihêle, kurd dikare çî bike?

Lê eva ku em hêviya xwe jî bo Kerkûkê û venegerîna wan ji dest bidin, şaş e. Çunku Barzaniyê nemir li dema şerê Eylûlê, li dema bêhêzî û bêhêvîtiya kurdan de amade bû ku şoreşekê bike goriyê Kerkûkê û dev jê berneda. Niha jî bi heman şêwe hewce ye ku kurd tenê bîr ji vegeandin û bidestxistina wan bike. Çunku ji bo maneweya kurd li nav Îraqê de hewce dike ku aboriyek bihêz bi Kerkûkê ve hebe ku bikare xwe pê biparêze. Lewre hewce ye hewl û xebatek mîcid bo çîbicîkirina madeya 140'ê bihê dayin.

## Derxistina mamostayên zankoyê pîlanek din a rejîmê



### Dara Natiq

Pîrsa bi zorî xanenişînkirina mamostayên zanko û derxistina wan bi hecetên cur bi cur, girtin û binçarkirina wan ji

aliyê dem û dezgehên evlehî û tepeserker ên rejîma Komara Îslamî a Îranê ve di wan çend Mehên dawî de pêvajoyek bileztir û berfirehtir bi xwe ve girtiye û bûye cihê nigeranî û nerazîbûna civaka navneteweyî û bitaybet civaka hişyar û xwedî zanist û demokrasîxwaziya gelên Îranê.

Bêguman ji her kesekê re rohn û eşkere ye ku siyaseta dijberîkirin û ji holêrakerîna neyarên nîzame û kuntîrolkirina zanko û navendên zanist û ronakbîriyên Îranê û zal kirina çanda besîcî û guherîna naveroka pirtûkên dersî bi îdeolojiyek berteng a şîe meseb, yek ji stratêjiyên kûr û demdirêj yê destpêka hatineserkara Komara Îslamî a Îranê bû.

Her li ser bîngeha vê siyasetê Xumênî di peyama newrozî a xwe di sala 1359'ê de ragihand ku diviya tevgera Îslamî di tewahiya zankoyên Îranê de pêk were û ew mamostayên ku xwediyê îdolojiyêkî rojavayî yan jî girêdayî bi bîr û bawerên partiyên Komonîst û marksîstî bin, bihên derxistin û zankoyên Îranê bibin bi mektebek bihêz û paqij bo perwerdehiya îdolojiya Îslamî.

Her li doma meşandina vê siyasetê de, anku piraktîze kirina pêvajoya bizava çandî (Şorîşî Ferhengî) de, ji bo her zankoyêkî şivrek kesî pêk hat ku erkê sereke ye vê şivré darêtin û danana pîlanên hewce ji bo olîkirina zankoyan bi îdolojiya Îslamî li ser bîngeha parastina nîzama dîktator a Komara Îsamî bû.

Her li ser esasa pîlan û cehd û bizavên han wezaretê perwerdehî û wezaretê çand û elimandinê a rejîmê ji bo besîcîkirina rewsê

zirûfa zankoyan û Îslamîkirin û kuntîrolkirina wan, dest bi kiryarên weke, cuda kirina kîç û kuran li xwendingeh û qedexekirina xwandekarên di hin rîştayên weke Endazyarî, Zanist, Teknîkî û Kîşawerzî û herwisa guherîna naveroka pirtûkên dersî kirin lê xebat bi dijî çanda rojava û girêdana sîstema seranser a zankoyan bi sîstemên kevneşop yê "Hewzeya Îlmî a Qum" û kuntîrolkirina zankoyan bû sedemê vê çendê ku parek berçav ji Mamosta û mirovên xwedî zanist welatê Îranê bi cih bihêlin û di encam de civaka Îranê roj li pey rojê ji karwanê pêşketina zanist û teknîkî ve pare ma.

Di wir de ya ku cihê baldanê ye ewa ye ku serbarê tev zext û givaş û asteng û girêpêçkên ku ji bo kintîrolkirina zanko û navendên zanistî yê welat ji aliyê navendên tepeserker ên Komara Îslamî ve dihate meşandin, pêvajoya demokrasî û azadîxwaziya a xwandekarên di Îranê de roj li rojê zêdetir geşe dike û zanko yê bûne çepera berxwedan û cihê birêveçûna bi şîpel a meşên nerazîbûnê li hember siyasetên biyom û azadîkuj û zanistkujê Komara Îslamî a Îranê.

Liv û bizavên azadîxwazane yê xwandekarên hişyar û xwedî zanist di zankoyan de û tagirî û rola berçav û bi bandor a wan di xurtkirin û berfirehtirîkirina tevger û meşên nerazîtiyê ên piştî ragehandinê encama maşkanêya bi nave hîlbiyartina gera 10' mîn, sitûnên bîngehînan rejîmê hejandin û tîrs û xofek mezin xistine nava dilê karbidestên rejîmê û nemaze Ehmedînejad û Xamîneyî.

Ji aliyekî din ve berfirehtirbûna tevgera kesk û piştîgîrîkirina beşek berçav ji mamosta û xwandekarên zankoyên Îranê ji vê tevgerê û rêberên vê bizavê anku Kerobî û Mûsewî, bûye sedemê tûrebûn û nerihetiya karbidestên nîzame ku di encam de bû sebebê helwêst û dijkiyarên tundtir ji aliyê navendên tepeserker ên rejîmê li hember



Kamran Danişçû, Wezîrê Îlûmê yê Komara Îslamî a Îranê

derxistin û veguhastina Mamostayên zanko û girtin û kuştin û îşkencekirina xwandekarên û herwisan kuntîrolkirina zanko û navendên zanistî.

Di çend rojînan derbasbûyî de Kamran Danişçû, Wezîrê Êlûm yê Îranê ragihand ku, ev zankoyên ku li dijî çanda besîcî bin divêt tevî axê bihên yekrastkirin. Navbirî herwisan zêde kir ku zankoyên Îranê ne cihê wan mamostayanin ku bixwazin dijî nîzama Komara Îslamî bilivin û mêjiyê xwandekarên bi çanda rojavayî bişon. Navbirî herwisan di rê û resma zankoya "Îlm û Senet" di heyamê derbasbûyî de ragihand, ew zankoyên ku heneku bi ferhenga Besîcî dikin, yan ger zankoyek hebe ku tede dengê baya nîvero bilind nebe, bi hinceta vê çendê ku zirarê digehîne kilasên dersî, yan zankoyek hebe ku berevajî rewîşt û tîtalên nîzame bilive, ya baş ewe ku ew zanko tu nebin, ji berku gava zankoyek han hebe, gelên Îranê, xwandekar, mamosta û karkirên zankoyê dê bi Îradeya xwe a mekteba Îslamî ji nav bibin.

Lê bi berhevdan û nêrînek kurt derheq wan pîrs û bûyerên ku me îşare pêkir, mirov digehîne vê encamê ku derxistina mamostayên zanko û bi zorî xanenişînkirina mamostayan, berhema berfirehtir bûna tevgera azadîxwazane û jordecûna asta hişyarî û zanistî a xwandekarên ji aliyekî din ve tîrs û xofa nîzame ji birêveçûna berfireh a meşên nerazîbûnê ji zankoyan û xurtirbûna tevgera demokrasîxwazî di Îranê de ye.

## RONÎ

## Quncikek ji bo şiroveya bûyer û babetan ji xwendevanên "Agirî" re

Ebdulla Hicab



## Dawî an destpêk cenabê Serok!

**S**erokkomarê DYA, Barack Obama, di axaftina xwe ya roja çarşemiyê de ji bo gelê Amerîka, bi awayê

fermî bi dawî hatina "Operasyona Rizgarkirina Îraqê" ragehand û da xuya kirin ku ji niha û pêve Îraqî bi xwe wê ewlekariya welatê xwe bi dest ve bigrin. Li gor serokkomar, ji koma giştî ya 150 000 serbazên DYA li Îraqê, 100 000 kes ji Îraqê derketine û 50 000 serbazên ku dimînin, wê ji niha û pêve perwerdeyê bidin Supaya Îraqê û xwe tev li karubarên hundirê welat nakin.

Li gor axaftina Obama, êdî şerê Îraqê ji aliyê leşkerê DYA ve bi dawî hatiye û ji niha û pêve erka amerîkaiyan li Îraqê "xebat ji bo baştir kirina pêşeroja Îraqiyane. Bi wî awayî, di fermiyetê de, erka leşkeriyê Supayê DYA, 7 sal piştî destpêkirina şer, dana 4 400 kuştî û mesrefa pitir ji 1000 milyar dollar li Îraqê bi dawî tê. Lê gelo bi wê ferman an bi wê daxuyaniyê re, şerê li Îraqê, an karê supayê DYA li Îraqê bi dawî tê? Leşkerê Amerîka çima kete Îraqê, di wan 7 salan de çi kir, çi destket bi dest xist û niha ku operasyonan bi dawî tine, rewşa Îraqê ber bi ku ve diçe?

Nayê texmîn kirin ku amadebûna 50 hezar serbazên Amerîka ku heya ber binê guhên xwe bi çekên herî modern teyar in li Îraqê, tenê ji bo perwerde kirina supayê nûye welat be. Binkeyên hêzên Amerîka ji navendên leşkeriyê Îraqê cuda ne. Ew yek diheger ku leşkerê Amerîka her weke "dema şer" ji hêrişên leşkeriyê dijberên Amerîka û afgirên rêjîma berê re armancên hêrişan bin. Her weha dema leşkerê Îraqê dikeve tengasiyê, her gava ku nekarî li hember êrişên dijberên xwe bi ser bikeve, wê neçar bimîne ku daxwaza alîkariyê ji serbazên Amerîka bike. Di rewşek wisan de îmkân nîne ku paşmayên leşkerê Amerîka li Îraqê ji şer û pevçûnên leşkerî parastî bin û xwe tev li şerê Îraqiyân bihevne nekin.

Armanca serke ya hêzên Amerîka ji ketina Îraqê, di gel guherîna rêjîma deselatdar, damezirandina sistemek nû ya siyasî bû ku li gor siyaseta Amerîka li Rojhilata Navîn tev bigere. Her çend armancên ragehandî di duktrîna siyasîye Amerîka di derbarê Îraqê de bi awayek din hatin ragehandin û weha hatibûn diyar kirin:

- Qut kirina destên rêjîma Seddam ji depoyên çekên komkujiyê ku li gor gotina Koşka Sipî Îraqê bi weşartî çê dikir û bi pêş

dixist.

Bi dawî anîna piştgiriya Îraq ji rêkxistinên terorîstî yê girêdayî bi tevgera Al- Qaîde re ku li gor amerîkaiyan Îraq amade bû çekên xwe yê komkujiyê bixe ber destê wan. Ew yek jî ji bo ewlekariya netewiyê Amerîka weke tehdîdek cidî dihat hesabandin.

- Rizgar kirina xelkê Îraqê li dest rêjîmek dîktator ku li hember xelkê xwe yê bê berevan çekên kîmyawî bikar anîbû.

Di wan 7 salên ku hêzên Amerîka li Îraqê bûn, ji aliyekê ve li ber hin şaşî û kêmasiyên ku bi kiryar tûş dibûn û ji aliyek din ve ji ber stratêjiya şaş ya serleşker û fermanarên Amerîkayî li heremê, baweriyek wisan li Îraqê çê nebû ku leşkerê Amerîka ji xelkê welat re ewlekarî u asayîşê bîne. Berewajî operasyonên xweser û bê kontrolê hêzên girêdayî bi kompaniyên taybete ewlekariyê weke "Blackwater" re rewşek wisan li Îraqê anîbû pêş ku baweriyê bi leşkerê Amerîka re, weke hêzên parêzvanê ewlekariyê pir kêmbibû.

Li aliyek din ve, piştî 7 sal şer, leşkerê Amerîka nekarî rêjîmek nû ya xwegir û xelkî li Îraqê dabimezrîne. Hêzên Amerîka her weha nekarî bi ser afgirên rêjîma pêşîn de bi tewayî bi ser bikevin. Bi hebûna xurt ya hêzên Amerîka li Îraqê re jî, hê niha jî kontrola hin deverên Îraqê bi tewayî neketiye dest supaya nû yê Îraqê. Hêzên Sunî deselata sereke li Romadî, beşek zor li Mûsil û herêmên navine Îraqê hene. Li başûrê Îraqê, hêzên Şîe ji hev belav in û her yek ji firaksyonên Bedr, Sedr û Meclîs E'ila xwediyê leşker û hêzên taybete xwe ne. Bi kinî, leşkerê Amerîka nekarî leşkerek hevgtirî ji bo Îraqê ava bike ku niha piştî kêmbûna huzûra wan, bikare ewlekariya Îraqê biparêze.

Di niya siyasî de Amerîka karî di wan 7 salan de rê ji bo avakirina deselatek nû xweş bike. Lê wê deselata nû tu gav nekarî hemû pêkhatiyên siyasî, etnîkî û netewiyê Îraqê tev li pêvajoya siyasî bike. Ji hindê jî zêdetir, sistema nû tu gav nekarî weke sistemek berpirsyar ku hemû xelkê welat bi yek çav temaşê bike tev bigere. Operasyonên tolistandinê, kuştinên sistematîk li dijî aliyên ku xweyî nebûn, bikaranîna polîs û deselatê ji bo xizmeta hizbî û etnîkî, bê seroberiya darayî û bi dehan û sedan kêmasî û ladanên din, dijberiyên hundirîn li Îraqê niha ji berê pitir kirine. Serweyî wan kêmasiyan, yasaya nû ya Îraqê hin kêmasiyên cidî di warê parastina mafê mirovan u demokrasîyê de



hene. Ew jî astengiyek din e li ser riya ava kirina sistemek çiyê baweriyê. Di gel ku başûrê Kurdistan rewşek xweser ya cuda ji rewşa siyasîyê Îraqê heye ku bi rewşa Îraqê re nayê muqayese kirin, lê aloziya siyasî li hemû Îraqê xuya ye. Serneketina fraksyonên siyasîye Îraqê di hewldana ji bo avakirina hukûmeta nû de, 5 heyv piştî hilbijartinê Parlemanê, bi xwe nîşan dide ku sistema nû ya Îraqê çiqas di çareser kirina pirsgrêkên welat de qels e. Lewma nayê bawer kirin ku sistema nû ya welat amade be bi awayek serbixwe kar bike û bikare ji pirsên siyasîye welat û bi taybet ji ewlekarî û asayîşa Îraqê re çareyekê bibîne.

Paşvekêşiya hêzên Amerîka ji Îraqê, pêwendî bi rewşa hundirê Îraqê ve nîne. Rastî ew e ku ev pêgav bi tenê kiriyarek sembolîk e ku Obama niha pêwistî pê heye ji bo ku ji gelê Amerîka re wisan nîşan bide ku sozên di dema hilbijartinê de dabû bi cî tine. Xesarên hêzên Amerîka li Îraqê ji ya ku Amerîkaiyan bi xwe hêvî dikir çend qat zêdetir bûye. Barê girane mesrefa şer li ser bûdçeya Amerîka, bi awayek raste rast karîgerî li ser rewşa navxwe ye welat heye.

Di gel kontrol kirina qeyrana abûrî û pêşî girtin ji tevçûna sistema bankî, lê Amerîkayê di dema serokkomariya Obama de nekarî pirsgrêka bêkariyê çareser bike. Rewşa abûrî hê ne di astekê de ye ku kêmasiya bûdçeyê dagire. Xelkê amerîka meraq dikin ku gelo Îraqî wê rojekê bikaribin li gor heza Amerîka sistemek nû ava bikin û her roj gumana wan di wî barî ve zêde dibe. Heta leşkerê Amerîka jî di rewşek wisan de nejjidil tevli şerê Amerîka li Îraqê dibû. Bi kurtî Obama ji bo kontrola lêgerên hundirî Amerîka pêwistî bi manovrek siyasî ya nû hebû. Pêgava sembolîk ya paşvekêşî li Îraqê bi wê rewşê ve girêdaiye. Ji wê bi der carê zû ye ku mirov li benda bi dawî bûna şer û nearamiyan li Îraqê be.

Doma nûçeya:

## Gotûbêj li pêxema aştiyê, Roja Quds jî li pêxema şer û xwînrêjiyê

Di nav welatên deverê de, Komara Îslamî a Îranê bi awayek eşkere, nerazîtiya xwe li hember pêxistina aştiyê û ragirtina şerê nîşan daye û Ehmedînejad di rêûesma roja "Quds" de got: " çarenivîsa Felestînê ji aliyê berxwedaniya xelkê wî welatî tê diyarîkirin, ne li Waşington, Parîs û Lendenê".

Her di vê pêwendiyê de dewleta xwebirêveber a Felestînê daxuyaniyek der kir û got:

kesê ku nûnerê xelkê Îranê nine û di hilbijartinan de firtûfêl kiriye û xelkê Îranê tepeser dike û desthilat dizîye, ne dikare û ne mafê vê hindê heye ku li ser Felestîn û Serokkomarê wê biaxive".

Ebo ridîne di wê daxuyaniyê de rû li Ehmedînejad got" kesê ku nûnerê xelkê Îranê nine û di hilbijartinan de fêl kiriye û xelkê Îranê tepeser dike û desthilat dizîye, nikare di warê Felestîn û Serokkomarê wê biafive".

Ehmedînejad roj îna derbazbûyî di rê û resma "Quds" ê de bi rexne ji desthilatdarên Felestînê gotibû " çarenivîsa Felestînê ji aliyê xweragiriya xelkê wî welatî tê diyarîkirin, ne li Waşington, Parîs û Lendenê".

## Dorpêçên Nû Ên Japonê Li Dijî Îranê

Dewleta Japonê roja îne, 03.09.2010'an, li ser daxwaza Amerîkayê, dorpêçên nû li dijî Îranê seba bernamêyên etomî ên vî welatî, berfirehtir kir. Eva jî di halekê de ye ku Tukiyo tevî Îranê bazirganiyên niftê heye.

Japon di meha Îlon a îsal de û pêka biryarnamêya 1929 a Şewra Ewlehiyê, birêvebirina dorpêçên nû li dijî Îranê qebûl kiribû, lê Amerîka ev welate hay da ku weke Ewrûpayê dorpêçên zêde li dijî Îranê birêve bibe.

Îran çaremîn çavkaniya kirîna neftê ji bo Japonê, piştî Eerebistan, Emarêt û Qeterê ye. Di sala 2009'an de Japon rojane 421 hezar bermîl nift ji Îranê dikirî.

Dorpêçên nû ên Japonê li dijî Îranê, kêmkirina têkiliyên bazirganî tevî bankên rejîma Îranê û sekinandina sermiyandarin di beşa enerjî li xwe digre. Dewleta Japonê herwiha di dorpêçên nû de samana 88 sazî û herwiha 24 kesan ku digel bernamêyên etomî ên Îranê de pêwendiyên bazirganî hebûn, dest biserde girt. Ev kesane herwiha nikarin hatinûçûna Japonê bikin.

Japon serbarê hebûa pêwendiyên berfireh ên bazirganî tevî Îranê, beriya niha jî bona sepandina dorpêçan bo ser Îranê, dest bi ser saman û heyîna 75 kompaniya û 41 kesan de girtibû.

# Rojev

## Dewsa Îranê li hemû kirîzên deverê de

Cirî Sîb

W: Arin

**B**arak Obama, Serokkomarê Amerîkayê li axaftina xwe ya derheqê Îraqê de, derketina hêzên şerker yê Amerîka ji Îraqê weke guhertinek mezin da zanîn, lê gotinên wî li heman hal de nîşan ji bûyerekek mezintir in. Xala balkêş li siyaseta mewcûd bi nisbet Îraqê, eve ku Obama niha mijûlê pêdeçûn bi ser çar aliyên bingehîn li siyaseta derve ya Amerîkayê de ye. Îraq, Efxanistan, pîrsa Filistin û Îsraîlê û herweha Îranê. Rayedarên dewletî wusa difikirin ku şansê serketina li her yek ji biyavan de zêdetir kirine û renga jî durust bifikirin, lê egera şikesta li Rojhilata Navîn de jî tim heye.

Obama vê kilîta pêdeçûnê ya siyaseta Amerîka li Rojhilata Navîn de li halekê de dişidîne ku ji wê weke alavek bo jinavbirina dilkutok û kêşeyên din û herweha zom û tekezirin li ser mijara Îranê û hemû hevalbendên wê mifahê bistîne.

Cuda ji wê ku şansê serketina vê pêdeçûna Obama çiqas be, hêlek diyarîkirî a hevbeş li dor Îraq, Efxanistan û dewleta xwebirêveber ya Filistinê heye. Li her yek ji wan biyavan de, armanca girîng eve ku kêşeyan bidawî bîne heya ku derfeta zom û pêregihştina zêdetir bi ser kirîza mezin a Îranê û hevalbendên îslamîst, radîkal û tundajo yê Îranê pêk were.

Êrîşa dewleta Bûş bi Îraqê jî li sala 2003'an de ji ber nîgeraniyên mewcûd ji gefa desthebûna tundajotiya Elqaîde bi rejîmek hov ji bo bidestxistina çekên komkuj piştî êrîşa 11' Septamberê bû. Ji wê demê ve ev gef derbasî riyek cuda bûye. Elqaîde niha berbilav bûye û metirsiya wê ji ber piştevaniya welatek bihêz ji wê nine, belkî ji ber reh û rîşal dakutînan li welatên weke Pakistan, Efxanistan, Yemen û Somaliyê ye. Li heman demê de jî gefên ji ber hewlên dewletek dujmin û hov ji bo bidestxistina çekên komkuj li holê de ye. Lê ew gef ji Îraqê naxuşikin(nawezelin), belkî çavkaniya wê ji welatê cîran, anku Îran û hevalbendên tundajo yê wê weke Hizbula, Hamas û girûpên din yê li bin tesîra rejîma Îranê de ne.

Manovrên siyasî yê Amerîkayê li deverê de ku ji yekem gera serkomariya Bûş de destpê kirin û heta du salên yekem yê desthilatdariya Obama dom hebûye û niha bi derketina hêzan ji Îraqê bidawî tê, piranî nîşan ji hewildan ji bo hevahengî bi waqîyetên nû heye.

Wekî diyar vekîşîna hêzan ji Îraqê weke hewlek ji bo kêmkirina zirar û xesarên li ser hêzên Amerîka û îsbatkirina vê rastiyê ye ku Amerîka şiyana damezrandina welatên ewle, sekolar û demokratîk li berbirûbûna bi hêzên tundajo û pawanxwaz heye. Li heman demê de zêdekirina hêzan li Efxanistanê de cehd û xebatek e ji bo îsbatkirina vê yekê li serzemînekê de ku armanca gefên zêdetir ji aliyê îslamîstên tundajo û radîkal e û navberek dûr û dirêj heya pêkanîna dewletek nawendî a tenah, ewle û dost bi rojava re heye.

Destpêkirina gotûbêjên Îsraîl û Filistinê di heftiya borî de, bi mêvandariya şîva Obama ji Binyamîn Natanyaho, Serokwezîrê Îsraîlê û Mehmûd Ebas, Serokê hikûmeta xwebirêveber a Felistinê, şeva Çarşamiyê dest pêkir, hewlek e ji bo kêmkirina destpêka teqîna vê kirîza hertimî, û di dawiyê de dewlet hewlên xwe ji bo pêkanîna zextên aborî bo ser Îranê dê bidomîne daku li awayekê rejîma Îranê neçar bi paşdekişyana li ser domandina bernamêya etomî bike. Hewlên han bi pejirandina biryarnamêya nû a Şewra Ewlekar a ser bi Netewên Yekbûyî di destpêka havîna îsal de dest pêkir.

Lê her yek ji kar û hereketên Amerîkayê bi nîgeraniyên hevî li ser Îranê û rol û desthilata wî welatî di herêmê de hatiye girêdan û bi hev re pêwendî hene. Di Îraqê de hewil ji bo cîgirkirina desthilatê di dewleta navendî bona pêşgirtin ji berfirehbûna desttêwerdanên Îranê tê dayîn. Di Efxanistanê de jî hewla rojavayê bona anîne serkara bisilmanên nermrew ji bo pêşgirtin ji derketina desthiladarên tundajo ên weke Îranê ye.

Destpêka dubare a gotûbêjên aştiyane netenê hewlek e ji bo pêkanîna aştiyê di navbera Îsraîl û Felistinê, belkî gaweke bona nehiştina pîrsa Felistinê û çareserkirina nîgeraniyên rêberên Erebi. Ev rêberane dibêjin kirîza Felistinê bûye sebebê turebûna xelkên welatên wan û di encam de bandor xistiye ser şiyânên wan bo hevkarîkirin tevî Amerîkayê derheq kundirolkirina zêdexwaziyan etomî ên Îranê. Ev pîrosya bandorê dixê ser kêmbûna hêza hevpeymanên rejîmê di bizava Hamas de. Kesên ku li hewla jar û lawazkrina hêza Mehmûd Ebas û alîgirên wî ên nermrew de ne. Helbet renga hemû ev liv û bizavane tevî bi pîrsgirêk û astengan berbirû bibe. Ev valahiya ku piştî çûna hêzên Amerîkayî di Îraqê de bicî maye, dikare bibe sebebê zêdebûna desthilat û destavêtinên rejîma Îranê. Herwiha renga gotûbêjên bi Felistinîyan seba avahîçekirinên nû ên Îsraîlê digel şikestê berbirû be û bibe sebebê vebûna destê tundajoyên dostê Îranê di nava Hamas û Hizbulahê de. Lewra metirsiyên pêdeçûna bi helwest û siyaseta Obama, bi qasî derfetên pêşiya wî zaf in. Nûçeya baş eve ku Serokkomar di qonaxê de li ser kar e ku ji aliyê herdu partiyên ve tê piştevanîkirin. Dema ku bernamêyên darêtî bi wî awayî ku pêşbînî kirine pêşve neçin, wî piştevaniyek han hewce ye.

Çavkanî: Wall Stîrît Jornal

## Kuştagêh yan girtîgeh?



### Ceifer Mubersîrniya

Felsefeya çêkirina girtîgehê di cîhana îro de, vedigere bo parastina ewlehiya jiyana mirovan ku yek ji erkê dewletan e.

Lewra em dikarin bibêjin ku girtîgeh ne ji bo mirovên asayî û bêsuç hatiye çêkirin. Belkî girtîgeh bona wan kesan hatiye avakirin ku berevajiyê yasa û pîvanên civakî tevdiagerin û kiryarên wan derbe li berjewendiyê xwedî tawanbar, endam û rûmetê civakê dide. Lê dîsan eva ne bi vê wateyê ye ku nabe derfet bi wan mirovan were dan ku tûşî şaşiyên dibin û dikevin girtîgehê, belkî di cîhana îro de ku gişt dewletên mirovdost û parêzerê mafê mirovan hewil didin bihayên mirovî bilind ragirin û cîhanek hêjayî wan ava bikin, kesên tawanbar jî derfek bi wan tê dan û cîhana mirovdost a îro li ser vê bawerê ye ku gişt mirov hêjayî vê yekê ne ku derfeta pêdeçûnkirin bi ser xwe bi wan were dan.

Lê di hin welatan de bi vî awayî mêzeyî mirovan nakin, nemaze welatên dîktator ku yasayên wan tu hevahengiyek tevî yasayên navnetewî nîne û zagonên wan li ser bîngê fikrî a neserdemiyane hatiye avakirin ku bersivderê eqlaniyeta civaka îro nîne. Bo mînak welatên weke Îranê ku yasaya wê li ser bîngê binav ola Îslamê hatiye avakirin, têde mezintirîn bêhurmetiyên bi kesayetiya mirovan diin, nemaze nêrîna wan derheq jinan ku weke mirovek nekemilî tê mêzêkirin.

Girtîgeh di rastî de cihê e ku dibe sebeb tawanbar têde bîr ji kiryarên xwe bike û ji şaşiyên xwe bihesê û hewla dúbarekirina wan kiryarên şaş nede.

Di Îranê de ku rejîmek bi navê rejîma Îslamî têde desthilatdar e, bo parastina desthilata xwe bi taybetî di riftarkirin ligel girtiyên de tu yasayeke navnetewî û heta îslamî liberçav nagire.

Di heyamê 31 salên derbazbûyî de girtîgehên Komara Îslamî pirr bûye ji



girtiyên siyasî, çalakên medenî, çalakên mafên jinan û dilsojên civakê ku ger pêka yasayên navnetewî werin dadgehîkirin, ne tenê bêtawan in, belkî mirovên han weke pêşrew û dilsojên gel tên nasîn û cihê rêz û hurmetê ne.

Bona şîrovekirinek pêtir, emê basa hinek ji riftar û liv û tevgera beşa dadwerî a Komara Îslamî a Îranê bi girtiyên re bikin.

Berî her tiştî, girtî bi çi tawanekê hatibe

girtin ji bo Komara Îslamî tu ferq nake. Bo mînak, ligor ezmûna girtiyên û bi gotina piraniya wan bi taybetî girtiyên siyasî û sîvil, di girtîgehên Komara Îslamî de gişt girtî bihevne ne û bendên wan ji hevdu ne cuda ne. Yanî girtiyên siyasî, sîvil û diz û mirovkuj hemû bihev re di bendekê de ne. Di halekê de ku girtiyên siyasî û çalakên sîvil kesayetiya wan gellek digel kesayetiya mirovên tawanbar cud ye û di bîngê de qet nabe mirovên hankî seba çalakîyên xwe ku ji bo rehetî û pêkanîna jiyaneke baştir bo xelkê û xizmetkirin bi wan xebatê diin, werin girtin, lê dema ku tên girtin jî, aliyê kê nabe tevî girtiyên ku tûşî tawanên naşîrîn bûne werin kirin. Çimku ev kiryarê han rasterast bi armanca terora zêdetir a kesayetiya wan û şikandina wan di warê hundurî de tê encamdan. Pirsê duyem mesela pêranegihîştin di warê paqîjî û lênepirsîna nesaxan di girtîgehê de ye ku îrorojê pîrsek mezin a girtiyên e ku gelek ji zîndanî seba wê xemsariyê jiyana xwe ji dest didin. Bo mînak em dikarin îşare bi mirina **Kawe Kurdmuqedem**, girtiyê siyasî ê xelkê bajarê Şinoyê di girtîgehê bajarê Urmîyê di heftiya borî de bikin ku seba nexweşiyê canê xwe ji dest da. Kawe Kurdmuqedem yek ji wan sedan kesan e ku bi egera xemsariya bi enqest a berpirsên girtîgehê rejîma Komara Îslamî canê xwe ji dest da.

Îşkencekirina girtiyên yek ji pîrsên din e ku hinek caran canê girtiyên distîne. Lê rejîm bona ewê ku faylên wan êşkere nebe, û di asta navnetewî de rexneyên zêdetir nehê ser wan, dema kesekîê nemaze girtiyên siyasî didalîqîne, amade nîne termê wan teslîmê malbatên wan bike. Çimku ev rejîma hov bi terzekê însanan îşkencê dike ku nîşaneyên îşkencê heya midehek zêde û hinek nîşane heta heta li ser bedenê girtiyên wunda nabe. Bo mînak em dikarin îşare bi Şehîd Ferzad Kemanger û hevalên wî bikin ku rejîma Îranê amade nebû termê wan teslîmê malbatên wan bike.

Gireva birçibûnê di bîngê de weke



diyarîkirina nerazibûnê derheq kêmasiyên girtîgehê û şewaza riftarkirina nobedarên zîndanê, ji aliyê girtiyê ve tê encamdan. Ew kare di girtîgehê Komara Îslamî de jî bi taybetî ji aliyê girtiyên siyasî û çalakên medenî ve tên birêvebirin, lê karê han heya astê mirinê jî diçe, lê dîsan desthilatdarên girtîgehê Komara Îslamî guh nadin wan û ewa jî dibe sebebê xirabûna rewşa tendurustiya girtiyên. Bo mînak Rehîm Reşî ku niha rewşa wî a saxlemê seba girevgirtin ji xwarinê pirr xerab e.

Meseleyek din şewaza îtirafsandinê ye ji rêya bikaranîna rêbazên durr ji exlaqên mirovî, ku derheq girtiyên nemaze girtiyên jin bikar tê. Weke îşkenceyên cism, piskolojî û destdirêjiya cinsî. Her di vê derheqê de em dikarin îşare bi îtirafwergirtin ji Ruya Tilûyî, çalaka sîvil ya Kurd bikin ku pêka gotina wê bi xwe ku rasterast li ser televîzyona VOA'ê bas dikir, ji aliyê hêzên rejîma Îranê ve di girtîgehê de destrêjiya cinsî bi ser hatibû kirin û gef lê hatibû swarin ku ger car din dest bide çalakîyên medenî yan karê siyasî bike, dê filma destrêjîkirin bi ser de, êşkere bikin. Yan neçarkirina girtiyên bona îtirafkirin di pişt şaşya mediayên dewletî bona lêbandina raya giştî ku yek ji wan metodên îtirafsandinê ye. Bo mînak îtirafwergirtin ji girtiyên ku piştî hilbijartina devra dehem a serkkomariyê hatibûn girtin.

Rejîma Komara Îslamî xwe bi nûnerê xwedê li ser erdê dizane û di çarçoveya îdelojîya rejîma Komara Îslamî a Îranê de her kesek ku rexne ji kiryar û hizrîna rejîmê bigire, bi buxtana "ser tevî xwedê" tê mehkumkirin û cezayê kesên han jî bal desthilatdarên rejîmê, darvekirin e ku gişt çalakên sîvil, siyasî û mafê jinan bi xwe ve digire.

Di encam de em digîjin vê encamê ku tenê di sistemek demokrat û sekolar de ye ku mirov dikarin bibin xwediyê maf û azadiyên xwe û tu kes seba hebûna rayek cuda yan rexnegirtinekê nahê dadgehîkirin.



## Madeyên Sirker Li Îranê! Belayek Ji Bo Xelkê, Neimetek Ji Bo Rejîmê

**Leyla Seadetî**  
**W: Hemîd Muxtarî**

**L**i destpêka îsal de, cigirê Navenda Cîvakî û Parastîne a ser bi Saziya Tendurustiya Tehranê, bi nigeranî ve bi nûçegihanana ragihand: Heya du salên din em dê tevî pîrsa kêmasiya textan ji bo nexweşên derûnî - piskolojîkî di nexweşxaneyên welat de berbirû bin. Wî herwiha zêde kir: Mixabin berpîrsên civakî ên rejîmê, pîrsa tûşbûna ciwanan bi madeya sirker a bi navê "şîşe" micid nagirin, di halekê de ku heya du salên din em dê tevî pîrsa nexweşên rewanî ên ku bengdarê madeya sirker a bi navê "şîşe" ne, berbirû bin. Seba wê ku tu dermanek bona çareserkirina nexweşiya wan cure bengdaran nîne, em nizanin divêt çi bikin? Gotinên vî berpîrsê civakî di halekê de bi nigeranî ve tê îlan kirin ku her di çend salên borî de, karnasan derheq tûşbûna ciwanan bi madeya sirker a bi navê "kirak" agehdarî dabûne berpîrsan. Lê mixabin tu berpîrsêkî rejîma Komara Îslamî a Îranê nîne ku guhê xwe bide wan kirzan, ev madeye bilez di nava ciwanan de belav bû û pêşengî ji madeyên weke "tiryak" û "hirûyîn"ê sitand û bû bi sereketirîn made bo kişandin û bikaranîne di Îranê de. Niha jî 1-2 sal dibe ku seba erzanbûna madeya "şîşe", ev madeya diçe ku cihê kirakê bigire.

### - 25 milyon kes tûşî bengdaryê bûne:

Wan rojane di Îranê de gellek yasayên çandî û civakî tîn pejirandin, yan tîn birêvebirin. Birêveçûna biryarên pêwendîdar bi modela pirça xortan, modela kincên ciwanan, rengê pirça keçan û... ji mînakên herî zindî di vî derheqê de ne û ji aliyê gellek ji melayên olî ve tekez li ser birêvebirna wê hatiye kirin. Yasayên han di demekê de birêve diçin ku hêj dewlet û meclîsê nekariye yasayên tund û qahîm derheq berhevanî û qaçaxkirina madeyên sirker ên pîşeyî weke "şîşe" bipejirîn in. Nebûna yasayên han ne tenê jiyana ciwanên me xistiye metirsiyê, belkî gellek malbat ji hevdu belav kirine û tîk daye. Di destpêka sala 1388 a Rojî di konferansa xebat li dijî bengdaryê ku di navenda xebat li dijî madeyên sirker anku "NACA" ê, birêve çû, yek ji mamostayên zanîngehê û karnasê warê bengdaryê çû pişt tirîbûnê û got: Di Îranê de 25 milyon kes bi awayên rasterast û nerasterast tûşî madeyên sirker in. Wê demê îlankirina vî serhejmariyê bû sebebê nişandana helwêstê ji aliyê berpîrsên navenda xebat li dijî madeyên sirker û berpîrsê hêzên întizamî çendî caran bi berdewamî bengdarên welatê Îranê kêmîr ji du milyon kesan îlan kir û ragihand ku bi xweşî ve di çend salên borî de û bi avakirina **kampaynên** destberdan û terkkirina madeyên sirker, hejmara bengdarên tûşbûyî bi madeyên han kêmîr

kirine. Eva jî di halekê de ye ku di çend salên borî de pêşkêşkerina serhejmariyên rast û cihê baweriyê ji aliyê berpîrsan ve, bûye sebebê pêkhatina nîqaşê di navbera karnas û berpîrsan. Heta hinek ji çalakên warê bengdaryê, berpîrsan tawanbar bi tûşbûnê û bengdarbûna ciwanan bi madeyên sirker dikin.

Serbarê wê ku tu serhejmariyê ron û dirust derheq hejmara bengdaran di welat de tune, lê karnas dibêjin zêdeyî yek ji sêye bengdaran, tûşî madeya şîşe hatine û vî madeyê dikîşînin. Lewra seba wê ku bengdarbûn bi vî madeyê pir metirsîdar e, divêt em di demek zû de çavniheriya bûyereke dilêş di civakê de bin.

### -Berhevanîna Zêdetir, Nirxek Erzantir:

Zêdeyî 4 salan e ku siyaseta giştî a rejîmê di pêwendî tevî xebat li dijî madeyên sirker hatiye îlankirin. Lê hêj yasa tevî siyasetên wan nehatiye rêkxistin û kêmasiyên zêde derheq pêşgirtin ji berhevanî, firotin, şandin û qaçaxkirina madeyên sirker ên pîşeyî hene. Ger niha li Îranê çend girem madeya şîşe bal kesekê hebe û ji aliyê polîs ve bê girtin, dê tenê bi 50 hezar tûmen pere were cirîmekirin. Nebûna yasayekê derheq kirîn û firotina madeya şîşe bûye sebeb ku hem serokên bandên berhevanîna şîşe bê tirs û bêxem karên xwe bidomînin û dema ku tîr girtin jî bi dana rehîne azad bin û hem bi belavkirina vî madeyê di bajaran de û kêmîrînan nirxa wê, hejmara zêde ji ciwanan bengdarê vî madeyê bikin. Eva jî di halekê de ye ku yasaya xebat li dijî madeyên sirker di komîsyona dadwerî a civata diyarîkirina berjewendiyên rejîmê, tep û tozê dixwe û midehek zêde ye ku dibêjin ev yasaya hinde nemaye ku were pejirandin. Lê hêj qaçaxçiyên madeyên sirker bi terzek azad belavkirina madeyên sirker di bajarên biçûk û mezin de didomînin. Li gor serhejmariya navenda xebat li dijî madeyên sirker pêvajoya jordeçûna berhevanî û bikaranîna madeya şîşe bi qasekê ye ku di sala 2007'an de, 42,86 kg şîşe, di sala 2008'an, 265kg, di sala 2009'an de, 951 kg, û di 45 rojên sala 1389 a rojî de 251kg şîşe ji aliyê hêzên întizamî ên rejîmê eşkere bûne û heya niha 2000 qaçaxçiyên madeya şîşe jî hatine destbiserkirin û di demek zû de jî azad bûne.

### -Serê Şanoyî(nimayîşî):

Kirîza bengdaryê piştî bêkariyê duyemîn kirîza Îranê ye û herçiqas dem derbaz dibe, hejmara wan zêde dibe. Lê serbarê vî yekê heya niha tu dezgehê fermî û yasadane a welatê bona çareserîya vî kirîzê tu gaweke micid neavêtîye. Her yek ji van dezgehên aliyek din tawanbar dikin. Dezgeha dadê, nebûna yasayê sebebkar dizane û meclîs jî cîbicînebûna yasayê sedema sereka dizane. Ji aliyek din ve



navenda xebat li dijî madeyên sirker a dezgeha serokomariyê, civata diyarîkirina berjewendiyên rejîmê bi tawanbar dizane û polîsên taybet bo xebat li dijî madeyên sirker ên ser bi hêzên întizamî jî gişt wan navendan bi berpîrs dizanin.

Midehek beriya niha, **Tata Tahîrî**, cigirê berpîrsê giştî yê navenda xebat li dijî madeyên sirker derheq pêvajoya pîr hêdî a pejirandina yasaya taybet bi madeyên sirker got: Paşkevîna pejirandina vî yasayê nemaze yasaya taybet bi madeyên sirker ên pîşeyî bûye sebebê mifahsitandina xirab a tawanbaran û kirêtbûna rûmetê welatê Îranê di nava gişt welatên din ên cîhanê de.

**Hemîdreza Husênabadi**, berpîrsê polîsên xebat li dijî madeyên sirker "NACA"ê, jî gotiye, seba wê ku endamên komîsyona yasayî a civata diyarîkirina berjewendiyên rejîmê, hêj tu yasayek taybet bi madeya sirker a bi navê şîşe nepejirandiye, û di vî derheqê de gellek ser hemda xwe kar dike, heya niha 2000 qaçaxçiyên madeya şîşe seba nebûna yasayê azad bûne.

### -Ektîvnebûna melayan:

Meleyên olî ku xwe bi rizgarkerê cîhan û axireta xelkê dizanin, heya niha xincî hîlbijartina bîdengiyê li hember kirîzek han a civakî de tu helwêstek din ji xwe nişan nedane. Ew tenê xwe bi rizgarkerê xelkê li hember hîlbijartina modela pirçê yan diyarîkirina modela kincên jinên civakê dizanin. Siyîd Ehmed Xatemî, pêşnimêjê demkî yê mizgefta Tehranê, nîgeraniya melayên olî ên Qûmê derheq "bêhicabiyê" - helbet li gor îdeolojiya wan- wek metirsîyek bo ser nîzamê hesaband û daxwaza berbirûbûn tevî bedhicaban kir. Lê di halekê de ku serbarê dana hişyarî ji aliyê dezgehên pêwendîdar bi zêdebûna bengdaran di Îranê de, heya niha tu meleyek di civînên fermî de derheq vî kirîzê tu helwestek negirtine û bikaranîna madeyên sirker heram nekirine?!

Bi hebûna ew xemsaî û kêmasiyên ku di warên yasayî û dadwerî de derheq xebat li dijî madeyên sirker di Îranê de hene û guhnedana berpîrsên hukûmetî û meleyên olî bi kirîza madeyên sirker ên pîşeyî di welat de, em dikarin bibêjin ku hebûna bengdarên zêde di civakê de, zêdetir ewlehiya hundurî û derûnî ji bo desthilatarên rejîmê pêk tîne û tenê ciwan û malbat in ku divêt tevî vî kirîza malvêranker berbirû bi bin.

## Yasayên Îranê Û Mafên Jinan



**Wurya Rehmani**  
**Bi kurmancî: Kewêzer**

Ji dema bidesthilatgihîştina rejîma dijî jin a Komara Îslamî heya niha, jinên Îranê bûne mezintirîn

goriyên sistema neadilane a binkeya dadweriya Komara Îslamî. Nîzama yasayî a Îranê - ku li ser çavkaniyên kevin ên Feqîhî hatiye darêtin- esla wekheviya mafên jin û mêran bi tewayî bînpê kiriye û cudahiya cinsî û bêdaletiyek zêde bi ser jinan de sepandiye. Çavkaniya wê bêdaletiyê, yasaya sivilî, yasaya bingehîn û bi taybetî yasaya cezayî a Îslamî ye ku hilgirê cezayên tundûtûjî û dijî rêsayên cihanî û mafên mirov û guhertin û pêkhataya civaka Îranê ne.

Xalên jêrîn hin ji wan mînakên bêdaletiyên e ku sistema yasayî a Îranê bi ser jinan de bi rewa dizane.

**1- Firejinî:** Yek ji girîngtirîn madeyên yasayî a Îranê ku weke bêhurmetiyek eşkere bo ser kesayetî û mezinahiya jinan tê hesêb, pîrsa firejinî ye - încâ çî bi awayek hertimî be û çî bi awayek demkî be-. Ligor madeya 942 a yasaya bingehî a Îranê, mêr dikare ji jinekê pêtir xwe re bixwaze. Di tu yek ji yasayên Îranê de, hejmara zewicînê diyar nekirine, lê ligor olzanên Îslamê, ji yana hetayî tevî 4 jinan ji mîrêkê re rewa ye. Li gel wê yekê jî hejmara zewicîna demkî "sixe" tu sînorek nine û mêr dikare li gel dehan jinan bizewice.

**2- Mafê Lixwekirina Kincan:** Ligoir madeya 638 a yasaya cezayî a Îslamî, nebûna hicabê bi tawan tê hesibandin û jinên ku bê liberçavgirtin û çibçikirina hicaba Îslamî di kûçêkulan û şeqam yan jî di cihên giştî de derkevin, bi hepsa 10 heya 2 mehan yan bi cezayê 50 hezar heya 500 hezar tûmen cezaya nexdî tînen mehkûmkirin. Serbarê wê yekê tu pênaseyek rast û durust ji hicaba Îslamî nehatiye kirin û biryardan li ser wê yekê girêdayî ye bi selîqeyên şexsî û cuda ên dadwer û birêveberên yasayê. Ev yeka jî rê ji bo pêkanîna zext û givaşan û girtina bêhêcet a jinan bi terzek berfireh xweş kiriye.

**3- Mafê xwedîkirinê:** Pêka madeya 1169 a yasaya medenî, di dema ji hevduveqetiyana jin û mîrê an de, xwedîkirina zarokên xort heya 2 salan û keç jî heya 7 salan li stûyê dayikê ye, lê dema dayikê dizewice, îdî ev mafa jî lê tê wergirtin. Ligor madeya 1170 a yasaya medenî, ger dayik di ew mideha ku mafê xwedîkirina zarokan li stûyê wê ye, şet be yan bizewice, mafê xwedîkirina zarokan jê tê sitandin. Herwiha pêka yasayê, derheq xwedîkirina zarokan, bab û bapîr servey dayikê ne û mafê wan ji dayikê zêdetir e. Di karûbarên aborî ên zarokan de jî, dîsan hem bab hem bapîr ji dayikê pêstir in. Zêdebarê wê yekê pêka madeya 220 a yasaya cezayî ên Îslamî, ger zarok ji aliyê bab yan bapîr ve bi enqest bihê kuştin, bikuj jî qesasê tê efûkirin, încâ dayika zarokê çî ji biryarê razî be yan jî nebe, ne girîng e. Bi wî awayî ger bab yan bapîr bi enqest zarokê bikuje, dayikê mafê dadxwaziyê û qesaswergirtinê nine. Lê ger dayik zarokê xwe bikuje, li ser daxwaza bavê dikarin diya zarokê qesas bikin û bikujin.

**4- Mafê şahidiyê:** Yasaya cezayî a Îranê ji

bo şahidiya jinan, di bingeh de yan tu rêz û hurmetekê nadanê yan jî şahadeta jinan nêviya şahadoya mêran dihesibîne. Ligor yasayê, şahidiya du jinan beramber e digel şahidiya mîrêkê, hin caran bê şahidiya mîrê şahidiya jinê her nahê qebûlkin û di hin meselan de, şahidiya jinê her nahê qebûlkin.

**5- Temenê balixbûnê:** temenê balixbûnê ji bo xort û keçan ne weke hev e. Pêka madeya 1210 a yasaya medenî, temenê balixbûnê ji bo xortan 15 sal û ji bo keçan 9 sale. Ku eva jî bi tawahî li dijî binemayên cihanî ên mafê mirovan e.

**6- Pêwendiyên cinsî tevî biyaniyan :** Di yasaya cezayî a Îranê de, peywendiya azad a cinsî bi tawan tê hesibandin û wî karn bi zîna nav dibin . Cezayê zîneyê ji bo jinên selt û mîrêkirî, 100 derbe şelaq e, lê ji bo jinên xwedî hevjin, kevirbarankirin e. Ligor yasayê, ev cezayên han ên nemirovane divêt li ber çavên xelkê were çibçikirin. Herweha pêka madeya 637 a yasaya cezayên Îslamî, hebûna tîkiliyên azad ên jin û mêran (heta ger zîna jî nebe) sûç tê hesêb û cezyê wê 99 derbe qemçî ye.

**7- Mafê Qesasê:** Ligor madeya 209 a yasaya cezayên Îslamî, mîrêk ku bi enqest jinek kuştibe, nahê qesas kirin, tenê di haletekê de nebe, ew jî eva ye ku divêt malbata kesê kuştî anku malbata jinê, nîvya xwînbihayê mîrê, beriya qesaskirinê bide malbata kesê bikuj. Ev jî di halekê de ye ku ger jinek mîrêkî bikujie, bê qeyd û şert dê were qesaskirin.


**8- xwînbîha:** pêka madeya 300 a yasaya cezayên Îslamî, xwînbîhaya kuştina jina bisilman, çî bi enqest be û çî bi neqest nebe, nîvya xwînbihayê mîrêkî ye. Bi wî awayê, yasa wekheviya mîrê ji yana jin û mîrê bînpê dike. Herweha ligor madeya 486 a yasaya cezayên Îslamî, xwînbîhaya pîza (cînîna) keç di zîkê dayikê de piştî 4 mehîyê nîvya bedelxwîna xortekî ye. Yek ji binemayên din ên neadilane a yasaya Îranê - ku weke bêhurmetiyek mezin bo ser kesayetî û mezinahiya dayikê tê hesêb-ewe ku ger jinek pêgiran ji kurekî 4 mehî, bihê kuştin, bedelxwîna zarokê 4 mehî di zîkê dayikê de, du beramberî bedelxwîna dayikê ye. Bi awayek din yasadaner, xwînbihayê pîza zarokê 4 mehî ji xwînbîhaya jinekê zêdetir dizane.

**9-Bindestbûna jinê di jiyana hevbes de:** Ligor madeya 1108 a yasaya medenî, divêt jin di her rewşekê de, guhê xwe bide qisê hevjinê xwe û bindestê wî de be. Hewcehiya bindestbûna jinê bê tu şert û merceke, di rastî de bi fermînasîna destdirîjîkirina mîrê ye bo ser jinê, ku niha di pîrraniya welatan de bi tawan tê hesibandin û cezayekê giran heye.

**10- Mafê cudabûnê:** Ligor madeya 1133 a yasaya medenî, mîr her demekê bixwaze dikare jina xwe talaq bide, lê jin ne xwediyê wê mafê ye.

**11- Mafê milk û mîratê:** Pêka giştî madeyên yasaya medenî ên taybet bi milk û mîratê, ji "madeya 861bigire heya 949'an" mafê jin û keçê ji milk û mîratê nîvya mafê mîr û xortan e.

**12- Mafê êxistina pîzê (siqtê cînî):** Pêka madeya 489 a yasaya cezayên Îslamî, êxistina pîzê ji aliyê jinan ve bi tawan tê



hesibandin û çî dema ku jin zarokên xwe berbiavêje, di her qonaxekê de be, divêt bedelxwîna wî/wê bide û bi xwe jî ne xwediyê tu pişkek ji wê bedelxwînê ye.

**13- Mafê hevvelatîbûna zarokan:** Yasaya medenî a Îranê, tu mafê taybet û serbixwe a hevvelatîbûnê ji bo jinan bi rewa nizane. Pêka wê yasayê, jin nikare esla hevvelatîbûna xwe veguhase bo zarokên xwe û hevvelatîbûna zarokên wê ji bavê zarokan ve tê sitandin. Wate bavê wan hevvelatîyê kîjan welatê be zarok jî dibe hevvelatîyê ew welatê.

**14- Mafê desthilatdariya malbatê:** Ligor madeya 1105 a yasaya medenî, serokatiya malbatê li stûyê malxê malê ye û jin bê îzna malxê malê nikare ji malê derve. Bi wî awayî, ger mîrê malê îznê nede jinê, jin netenê ji mafê karkirin li derveyî malê de bêpar e, belku bê îzna mîrê heta nikare bo kirîna hewcehiyên jiyane û seredana kesûkarên xwe biçê derê. Herweha ger jin bixwaze sefera derveyî welat bike divêt îzaza hevjinê wê, ew jî bi awayê nivîskî hebe.

**15- Mafê akincîbûnê:** pêka madeya 1114 a yasaya medenî, divêt jin di wê avahiyê de akincî be û jiyane bike ku mîr jêre diyarî dike. Bi awayek din, yasaya mafê diyarîkirina avahiyê ji jinan hatiye sitandin.

**16- Mafê hîlbijartina hevjinê:** Ligor madeya 1059 a yasaya medenî, mîr di diyarîkirina jinê de, serbest e, heta dikare ligel jinekê nemisilman yan derveyî welatê xwe jî bizewice, lê mafê han ji jinê re tune.

Ev xalane, hinek ji wan madeyên yasayî ne ku heta mafên here destpêkî û seretayî ên medenî û cinsî jî jinan sitandine û bi bêhurmetîkirin û diperawêz xsitina wan de, rê ji bo serhildana diyardeyên weke xwekujî, xweşevitandin, helatin ji malê, xwefirotin, tunûtûjî, destdirîjîkirin, ji hev cudabûn, êxistina pîzê, bengdarbûn û ferq û cudahîpêkanîna di navdêrên kar, dibistan û zanîngehan de, xweş kiriye.

Rejîma Komara Îslamî, ne tenê nikare weke desthilatek olî wekheviya jin û mêran qebûl bike, belkû hewil dide bi piştgirêdan bi olê pasawê ji bo ferq û cudahiyan han bîne. Rejîma Komara Îslamî her bi wê hêcetê û pasawê, rexnegirên nedadperweriyên han tawanbar dikin di dujminatîkirin tevî ol û fermana xwedê û bi şewazên curbicur wan tepeser dikin. Lewma dema ku dijberîkirin tevî jinan û bînpêkirina mafên wan bûye yek ji siyasetên fermî ên Komara Îslamî, heta bi xeyalde anîna betalkirina yasayên han, çavniheriyek bêencam e û her bi wî awayî ku ezmûnan nişan daye, tenê bi sernixoniya wê rejîmê ye ku wekhevî û edaleta cinsî di nîzama maf a Îranê de, cihgir dibe.

## BIYANÎBÛN

ADAR JIYA  
adarjiyan@mynet.com

Kaniya Helbestan

## Henaseyên şê' rî

Ebdulrehman Bamernî - Duhok  
Bamerni77@yahoo.com

## "Pêşmerge"

Her bihosta pêyê xwe lê danî  
şûnpêyên min in û

gullekek ya vêketî!

her dara mezin a bigehiyê û

liber sîbera wê birûnêy

gora şehîdekê ye û

divêt sirûda Ey Reqîb li ser bixwînî...

## "Tiberrick"

Li pehnatiya

bajêrê ez lê jîdayîk bûm

maç û sîndên xelkî

destên şêxî bûn!

piştî maçên tilistarên

maçên şêxan jî

berêvey bajêrî bûn...

## "Nihênî "

Davên pirça te

wek peyvên şê' reka min

çavên xelkî radikêşin!

çend bikevin ber davên şey û

hilî bibin...

hind şêira min belav dibî û

nihênîyên ciwaniya te

radigrîft...

**B**iyaniyên, veguherandina derûn û kakilê jiyana mirov a xweser û taybet ku bêhemd li bêahengî, bêwateyî û jixwebidûrketineke bêyom dadigere ye. Bi vegotîneke din biyaniyên, mirov ji kirdeya jiyane derdixê û wî/wê wekî biresereke bêniyx û tiştêyî dide bikaranîn û xebitandin.

Kengî ku ber û berhemên ku mirov bi destê xwe diafirîne hin bi hin ji reseniya xwe bidûr dikevin û ku bedewî û gewzîneriya wan ber û berhemên li dijîminahî û têkbirina mirov dadigerin, wê çaxê biyaniyên mirov û civakê jî dest pê dike. û wê gavê mirov û civak dibin dîl û bindestên ber û berhemên ku wan bi destê xwe afirandine. Biyaniyên, bi awayekî jî bi alozî û tevliheviya pêwendiyên civakî re rû dide. Belê ev geremol û aloziyên civakî ne îro; hê di destpêka xwedîtiyê (mulkiyetê) derketine holê. Xwedîti, her çend ku çendanî û çawaniya hilberiyê zêde dike jî, xwedîtiya arizî ya ku gihîştîye merhaleya îro, xwezayê û hemû heyberên wê roj bi roj dihelikîne.

Biyaniyên, di derûniya mirov de, di encama lêkdana hewldanên ku bi mebesta jiyanê serbilind û rûmetdar dest pê dike û liv û bizavên ku mirov gav bi gav arasteyî bêrûmetî serberjeriyê dike de pêk tê û teşe digire. Her çend ku rûxînerî, wêrankerî û biyaniyên mirov a civakî di hemû warên jiyane de pêkan be jî, dîsa cerbirandin û ewêzî (xelef) û vegeandina wê tiştêkî gengaz e. Belê çilvirîn, kavilkirin û dejenerakirina wêjeyê tu car bi hêsayî nayê cebirandin epêkan e jî. Ango, bêeslikirina civak an jî neteweyekê, pêşî bi bişavtî û biyaniyên wêjeyê dest pê dike. Bi kurtayî jehra biyaniyên û bêesilbûna civakê, di serî de xwe di wêjeyê de dide der. Peyre jî hin bi hin li hemû rehên çanda gel û civakê belav dibe û wê dîl radest digire. Ji do heta îro- di dîroka wêjeya gelan de- lixwewedîbûn û jixwebidûrketina mirov û civakê, wekî du dijîminên pozber û lêkneker misêwa bi hev û din re şer dikin û dikevin cirê. Herdu dijberên qedîm û kevnar her dem li dij hev belê pevne dijîn. Bi heman awayî jî her gav bi hev û din re dikevin nava rikbariyeke giran. Bi vê lêkdanê dijwar re yek li ya din dadigere. Şerê navbera herduyan dişibe şer û pevçûnê navbera mirovên bilebat û afirîner ên ku puxteya jiyane bidest dixin û kesên têkçûyî yên ku di nava hevêkî û aloziyan de winda dibin. Ev şer û lêkdanên bênavber car caran li serkeftinê bêhempa û car caran jî li têkçûnê bêkêr û bêxêr

dadigerin. Bi awayekî din, yek yekê winda dike an jî yek yeka din dişibîne xwe.

Mirovahî, digel ku tiştên pir payebilind û qîmetdar diafirîne bi heman awayî gelek tiştên kerax bêteşe jî dixuliqîne. Ji aliyekî ve di hêla zanist û teknolojiyê de pêşve diçe; şoreş û veguherînên pêemsal bidest dixê û ji aliyê din ve jî nîrx û hêjahiyên dîrokî bi destê xwe ji holê radike. Zimanê ku bi hezaran sal hatiye axaftin, çand û hunera ku dexmeya xwe li dîrokê daye, wêjeya ku bûye ronîdariyên dîrokî û hwd. hemû bi teknolojiya nûjen re hêdî hêdî ji çanda jiyane vedikişin û hin bi hin winda dibin.

Mixabin îro ro mirovahî xwe dispêrê civakeke yekpar, bêruh, bêgiyan bêhest û bêaman. Bi vê yekê re dahatûya cihanê û tevî mirovahiyê dikeve xetereyê mezin û çarenîn. Lewre mirovahiya ku ji wêje, huner û estetîzma giyanî bidûr bikeve, dê tucar nikaribe xwe ji belawat û karesatên vê dinê reha bike. Bi vegotîneke din; biyaniyên li şûna ku mirov her gav bi kesên din re di nav kar û xebatên hevpar û sîdewar de be, hêjahiyên payedar biafirîne; ji aliyekî ve ji reseniya xwe bidûr dikeve ji aliyê din ve jî dikeve nava liv û bizavên pelos û di tevgerên kerih û bêyom de digere. Hêçku wêje, bi hemû lihemberderketina liv û bizavên bêsinç û tevgerên derexlaqî ye. Hovîti, pesarî û hovîtiya mirov bi saya wêjeyê û berhemên wêjeyî ji holê radibe. Her wiha kemilîn, peresîn û şarezahîbûna mirov a derûnî û ramanî jî dîsa bi saya wêjeyê bidest dikeve. Wêje, perwerdekirina peyvê, sererastkirina axaftinê, gewzandina hestê, stewardîna ramanê û ya girîngtirîn jî bedewkirina liv û bizavên mirov e.

Rewşa ku em tê de ne, rewşeke gelêrî (anonîm) e. Ev nediyarî dibe sedema jixwebidûrketin û biyaniyên mirov û mirovahiyê. Ji ramanwerên ku biyaniyên bi awayekî rastîn rave kiriye yek jê Albert Camus e. Camus dibêje; "Mirov bûne biyaniyên jiyana û bizavên xwe" Rast e. Mirov hay ji jiyana û çîhana xwe ya ku tê de dijîn, nîn e. Kes nîzane kî çî dike an jî kî ji bo çî, çî dike. Êdî teqet û mecala mirovan nemaye ku arasteyî liv û bizavên xwe bibin û jiyana xwe ya rojane bi rê ve bibin. Mirov, li hember bûyer û karesatên ku roj bi roj jiyana wan diherimîne bêdeng dimînin. Ne bandoreke erênî li vê rewşa kambax dike û ne jî ji van neyîniyan wêneyeke erênî distîne. Bêhêvî û bêhevîkariyê xurt xwe li hemû mefselên jiyana mirov rapêçaye û dil û mêjiyê wî/wê dîl girtiye.

## Tonî Bilêr: Tenê Êrîşa Leşkerî Dikare Rewşa Îranê Normal Bike

Serokweîzrê Berê yê Brîtanayê Tonî Bilêr diyar kir ku pêwîste civaka navnetewî xwe bo êrîşa leşkerî bo ser Îranê amade bike.

Tonî Bilêr di hevdiînekê de digel Ajansa Nûçegihaniya BBC'ê behsa pirtûka xwe ya nû dike ku




ve dawiyê nivîsandiye û zêdebarê behskirin li ser pirsgrîkên Rojhilata Navîn wiha dibêje. "Bi tu awayekê nabe rê bi Îranê bihê dan ku bibe xwediyê çekên nukleerî û ger rojekê ew welat çekên etomî bidest bixe tu riyek namîne xincî êrîşa leşkerî bo ser vî welatî".

Bilêr daxwaz ji Komara Îslamî a Îranê kir ku guh bidin axaftinên wî û di xema welat û hikûmet û deverê de bin. Derbarê êrîşa ser Iraqê jî Bilêr wiha domand, "Me digel hevpeymanên xwe biryara bicî da ku êrîşî bikin ser Iraqê, ji ber ku hikûmeta wî welatî hem bo xelkê Iraqê û hem bo xelkê welatên deverê nebaş û metiridar bû."

## Di Gerstêrka Mirrîx De Jiyan Hebûye

Ajansa esmanger a Amerîkayê "Nasa", di raporekê de eşkere kir ku niha tîmên ajansa wan li gersitêrka Mirrîxê ne û li dîv şûnwarên jiyane di wê gersitêrkê de digerin. Wan karîne hinek ji madeyên sereke ên pêkanîna jiyane peyda bikin.



Herçend ew rapor wê

yekê dernaxe ku di dema niha de li wir jiyane heye yan na, lê hêviyekê pêtir dide pisporekê "Nasa"ê ku ji wê yekê piştrast bin ku di wê gersitêrkê de jiyane heye yan jî hebûye.

Hêjayî gotinê ye çendî sale ajansa "Nasa"ê, mijûlê vekolîn li ser wê yekê ye da ku bizane li wir av hebûye yan na, lê bi vedîtinên nû yên ajansa "Nasa", niha derketiye ku serdemekê gersitêrka Mirrîxê bi tewayî di bin avê de bû ye. Niha jî geryana "Nasa"ê, eve ku vekolînê li ser wan madeyên organîzm bikin ku şûnwarên jiyane di wê gersitêrkê de eşkere dikin.

## Gişt Endamên Tîma Bayskil siwarî A Îraqê Ên Beşdarê pêşbirkêya Pehlewaniya Erebi, Kurd In


Îbrahîm kerîm, serperestê giştî yê **Bayskil siwarî** keç ên Îraqê ragihand, Yekîtiya **bicycle siwarên** Îraqê navê 8 keçên lîstikvanên ên Îraqê bo kêbirkêya pehlewaniya Erebi li Tonîsê eşkere kir ku cihê keyfxweşiyê ye tewaye sitafa rahênan û lîstikvanên wê tîmê, Kurd in.

Hêjayî gotinê ye ku keçên lîstikvanên ên herêma Kurdistanê di hemû kêbirkêyên Îraqê de serkevtinên mezin bidest xistine.

## Du Weşanên Nû ji aliyê du hevkarên Agirî ve

Pirtûka "Gardiyan" ji nivîsina bûbê Eser, pirtûkek nû ye ku wan rojane ji aliyê Şehab Xalidî ve ji diyalîkta Kurmanciya jorîn bo Kurmanciya jêrîn hate wergerandin û kete ber destê xwendevanan.

Pirtûka "gardiyan" romanek rastîn e ku bas ji biserhata dilêş a îşkencekirina zîndanîyên siyasî ên girtîgha bajarê Diyarbekirê dike.



Navê pirtûkê anku Gardiyan, tê wateya zîndanvan û bas ji metodên îşkencekirin di girtîgha diyarbekir de dike.

\*\*\*

Herwiha pirtûkek din bi navê "Tu û Evîna Platonîk", ji nivîsina Loqman Polat, wan rojane derket. Pirtûk 112 rûpel e û tede kurteçîrokên curbecur hene. Kurteçîrokên ku di pirtûkê de ne, ji aliyê nivîskar ve ji nav rastiya jiyane û lêzedekirina xeyalên cihêreng bi şeweyeke edebî hatine afirandin.

Nivîskarê pirtûkê Loqman Polat rastiyan jiyane û xeyalê tevlihev kiriye û bi sitîleke modern novelên kurdî yê nivîsiye.



Ev şewê nivîsîn, niha şûnde dê bibe rengê naverokên berhemên Loqman Polat yê kurteçîrok, kurteroman û romanê, dê bibe metoda teknîka nivîskariya wî."

Rojnameya Agirî serbarê destxweşîkirin ji her du rojnamevan û hevkarên xwe, Şehab Xalidî û Luqman Polat, hêviya serketin û berdewamiya di xizmet û dewlemenkirina pirtûkxaneyê kurdî de ji wan re dixwaze.